



Mensajem ba tinan 2023

Moris interior no Solidariedade

Iha ne'ebé ita bele hetan fonte ka hun ba fraternidade universal iha iha ita nia familia humana no kriaun tomak nia leet? Iha hatán/resposta oi-oin ba mahusuk ne'e ne'ebé dezenvolve tuir tempu no iha tradisaun espiritual husi ema oi-oin iha rai-klaran.

Ba kristaun sira, tempu to'o ona atu to'o ba kompreensaun ida klean liu kona ba fiar. La'os katak atu tau sira nia an iha oin no katak sira hatene hatán ba buat hotu, maibé atu inklui an efektivu liu ba buka komun ida ho ema sira ne'ebé lakohi hakruk ba sira nia fiar, no hili liu atu hatán ba asunto sira lor-loron nian. Mensajem ba tinan 2023 ida ne'e koko buka atu identifika dalan no maneira sira oinsa tulun hafoun no haklean fiar kristaun iha ita nia tempu.

“Harohan no halo buat ne'ebé justu”. Iha tempu susar sira durante Funu Mundial ba daruak, ida ne'e mak intuisaun (hanoin ruma) husi Pastor Dietrich Bonhoeffer¹. Wainhira nia iha prizaun, nia refleto kona ba aspetu esensial sira iha moris Kristaun. Iha tragedia funu nian ne'e nia laran, nia hamriik metin. Iha tempu nakukun hirak ne'e nia haré momos katak:

¹ Aktivu iha resistensia kontra Hitler no iha Igreja ne'ebé nia confessa, Dietrich Bonhoeffer (1906-1945) hetan kastigu iha prizaun husi tinan 1943 no ema oho iha tinan 1945. Nia suart no reflesaun sira ne'ebé hakerek wainhira nia iha prizaun, iha influensia tebes hafoin funu no to'o ohin loron.

Ita nia sai Kristaun ohin loron ne'e sei limite ba buat rua deit: hamulak no halo buat ne'ebé loos iha humanidade nia le'et. Kristaun hotu-hotu nia hanoin, ko'alia ka organiza buat ruma tenke moris husi sira nia orasaun no aksaun.²

Oinsa mak ita traduz hanoin ida ne'e ba ohin loron? Ema ida-idak bele hatán rasik ou bele fo rasik sira nia resposta. Iha Taizé ami bele dehan: hodi haklean ami nia moris interior no ami nia solidariedade ho ema seluk ka, ho liafuan seluk bele dehan, hodi haburas ami nia moris orasaun nian no haluan ami nia amizade.

Atu deskobre sinal Maromak nia presensa iha ita nia moris, Dietrich Bonhoeffer nia sasin bele ajuda ita. Nia konsiente tebes ho buat aat ne'ebé akontese iha nia tempu, maibé iha lian interior ida ne'ebé dudu nia, hanesan ema barak iha tempu uluk no agora, atu hili hodi laran-metin no fiar iha Maromak no humanidade maske iha situasaun ho violensia extrema.

Ohin loron, iha ita nia situasaun, ita bele hili atu confia/fiar. Ita livre atu diserne, iha ita nia mundu, naroman ida ne'ebé mai husi fatin seluk. Maske ita liu hela husi terus boot ida, maske dalaruma haré hanesan Maromak la hatán ba ita nia tanis, naroman ne'e mosu ona hanesan fitun dader nian iha ita nia fuan (2 Pedro 1, 19).

Hili Konfiansa

Ohin loron, wainhira naha todan hanehan dersaaan foun sira, no la'os sira deit, saida mak bele muda ita nia hateke no hafanun ita nia kriadividade? Los katak iha motivu oi-oin atu ita sente ta'uk, sirkumstansias ne'ebé bele afeta ita nia vizaun ba mundu no maneira oinsa ita hateke ba ita nia-an. Ema balun to'o husu kona ba Maromak no Ninia presensa iha mundu ne'e.

² "Reflesaun ba batismu D.W.R. Bethge" (Maio 1944), iha resistensia no submissaun, pg. 300.

La hakmatek mak reasaun ida ne'ebé ita bele komprende. No ne'e mós di'ak se nia lori ita atu haré no komprende buat hirak ne'ebé ameasa ita, no hodi hatene. Ita mós tenke kuidadu atu la monu ba fatalismo, cinicismo no ta'uk, ne'ebé bele taka ita iha aspira negativo.

Atu bele hasees-an husi ameasa hirak ne'e, Evangellu/Liafuan Di'ak orienta ita hodi hatudu ita ba Cristo Jesus, ne'ebé hakat uluk iha ita oin. Iha Cristo nia moris tomak, nia mós experiensia ksolok no la hakmatek. Nia terus hostilidade oi-oin ne'ebé lori nia to'o violensia Kruz nian. Maibé mate la'os mak liafuan ikus, tamba Maromak halo Nia moris-hias husi mate. Nia moris ba nafatin. Ne'e mak furak Evangellu nian. Sasin dahuluk sira konvida ita atu ariska fiar iha mensagem ne'e.

Ohin loron Cristo la'o hamutuk nafatin ho ita, atu fo hatene ba ema hotu Maromak nia domin ne'ebé laiha rohan. Hodi Espírito Santo, Maromak nia iis, Nia halo ita hamriik metin, haraik ba ema ida-idak dignidade fundamental ida.

Ne'e duni, mai ita husik ita nia-an hetan guia la'os deit buat ne'ebé mai husi liur, maibé mós, mai ita simu naroman ne'ebé mai husi laran, confiansa ne'ebé hanaran fiar.

Buka hafoun iha orasaun/harohan

Hodi hateke ba ita nia-an, ema seluk no mundu ne'e ho matan/maneira foun, presiza etapa pessoal ida. Ne'e akontese iha ita nia laran ne'ebé kle'an, wainhira ita loke-an atu simu ho ksolok Maromak nia presensa. Ida ne'e involve mudansa iha diresaun interior, iha ne'ebé Evangellu hanaran konversaun no ne'ebé lori ita atu simu konsolasaun Maromak nian no atu hadomi liu tan.

Ita hotu bele buka fatin no tempu atu hamoris silensiu interior ne'e, atu fo fatin ba rona, no atu deskobre komuñan ho Maromak. Jesus konvida ona nia belun sira atu halo ida ne'e: “wainhira ó harohan, tama ba ó nia kuartu no taka odamatan, hodi harohan sub-subar ba ó nia Aman.” (Mateus 6, 6)

Ohin loron, konvite ida ne'e haré hanesan kontrariu uituan. Ita iha hela tempu polarizasaun (pamer) intensu ida no sosiedade fahe malu, dalaruma mós iha uma kreda no família sira. Iha kontextu ida ne'e, barrullu ka bosok hadau/hakat liu silensiu no dezenvolvimentu interior ne'ebé presiza tempu atu buras.

Tan ne'e mak harohan sai esensial tebes: ne'e mak abut laran-metin nian, dalan ba hakmatek/serena; ne'e halo ita bele loke nafatin odamatan ba diálogo/dada-lia, maske ho sira ne'ebé la hanesan ho ita ka sira ne'ebé mai husi orizonte seluk.

La'ó hamutuk ho ema seluk

Iha sorin seluk, iha mós konvite ida: atu la'ó hamutuk ho ema seluk, iha diresaun ba fraternidade universal iha ne'ebé ita koko atu diserne ninia sinal sira. Moris interior la'os aspirasaun isolada ida ne'ebé ita buka mes-mesak; maibé haluan ba ho sira ne'ebé iha aspirasaun hanesan.

Ita bele hahu hodi tulun haburas unidade Kristaun nian. Loos katak la'os atu sai forte liu iha mundu ne'e, maibé atu liberta dinámika Evangellu nian. Ita la presiza hein atu harmoniza uluk mahusuk/pergunta Teológico sira molok bele mai hamutuk hodi reza.

Wainhira ita halibur malu ho Kristaun sira husi denominasaun seluk, dalaruma ita konsiente fali ho pozisaun sira ne'ebé haré hanesan incompatível. No tuir lolos, dalaruma nune'e duni, iha termu konseptual sira. Em vez de emfazia sira, ita bele aproxima ho maneira seluk: sempre hahu ka hahu fila-fali hodi reza hamutuk. Pratika unidade ida ne'e bele tulun ita atu Maromak nia emar sira hakat ba to'ó konfesaun fiar komun ida.

Karik ida ne'e mós bele tulun ita muda ita nia maneira hateke ba Uma-Kreda: bebeik ba bebeik ita bele ka konsidera hanesan familia boot ida ne'ebé, iha Cristo nia ain fatin, hili atu hadomi? Atu sai fermentu dame nian, tempu ona atu hapara fahe malu iha ita nia le'et, hela nafatin iha dalan hanesan ne'ebé la halo ita hasoru malu.

Ita nia esforsu atu buka unidade vizivel ne'e tenke la'o hamutuk ho rekoñesimentu ba buat aat ne'ebé dalaruma akontese iha ita nia Uma-Kreda no kompromisso atu halo mudansa hirak ne'ebé konsidera nesesário. Ema barak haré katak sira nia konfiansa rahun tiha. Iha Taizé mós, ema balun nia konfiansa trai/harahun tiha, ami konsiente ho ida ne'e. Konfiansa mak realidade frájlil ida ne'ebé presiza hafoun no harí fila-fila, no ne'e so bele deit bainhira ita rona ba ema sira ne'ebé kanek ona.³

Haluan ita-nia amizade

Atu bele kontribui ba fraternidade universal, Uma-Kreda hetan bolu/konvite hodi sai sinal ba Maromak nia Reino ne'ebé atu mai, no atu deskobre sa mak Espírito Santo bolu ita atu halo ohin loron. Tuir mai mak bolu/konvite hirak ne'e balun, atu bele haklean hamutuk ho ema seluk:

- Ohin loron, ba ema barak, sentidu pertense ne'e sai esensial tebes hodi bele harí sira nia identidade. Pertense ida ne'e bele dezenvolve, la'os ho oposizaun no iha konflitu ho ema seluk, maibé liu husi respeitu no sorumutu. Loos duni, mai ita buka lialos ne'ebé iha, iha ema seluk, no ne'e sei tulun ita atu dezenvolve.
- Dialogo/dada-lia entre relijiaun oin – oin mak bele sai fatin ne'ebé iha respeito mutua. Iha dada-lia ne'e, atitude loke an ba malu bele sai possivel wainhira ita rasik metin iha ita nia religiaun nia tradisaun sira, hanesan ai-hun ne'ebé presija abut kle'an hodi bele habelar nia sanak sira. Amizade autentiko ne'e possivel maski dalaruma inklui mós terus, ne'e hatudo lolos katak la'os ema hotu iha konviksaun hanesan ho ita nia konviksaun.

³ Kona ba tema ida ne'e, haré mensagem irmão Alois nian "iha Uma-Kreda no iha Taizé, serbisu ba lialos tenke la'o ba oin nafatin", publika iha okaziaun enkontro Europeu iha Rostock no bele asesu iha www.taize.fr/protection

- Ohin loron ema barak mak kanek hela hodi hatene katak rasa no forma diskrimisaun oin-oin hanehan hela ema ida-idak sira nia relasaun no mós sociedade hotu iha mundo. Mai ita hotu hamutuk buka buat ne'ebé bele tulun atu troka ita nia maneira hodi haré ba ema seluk, hanesan hodi rona ba sira ne'ebé husik hela sira nia rai moris fatin/nasaun. Mai ita simu ema seluk ne'ebé hola parte iha “seluk” ne'ebé halo ita nia sorumutu nu'udar rikusoin ida.
- Ita atentivo ba mundu nia terus no matan been? Ita ema nia aktividade no ‘la sibuk’ sira hakanek ita nia planeta nebe nakonu ho buat furak oi-oin, hanesan dezastre natural no mudansa klimatika ne'ebé sai makas liu iha tempu hirak ikus ne'e fo hanoin mai ita. Ida ne'e urgente tebes atu haré fila-fali ba ita nia responsabilidade ne'ebé Nai Maromak haraik ba ita ema. Desizaun Politika no Ekonomika sira sai imperativo liu, maibe ita ida-idak bele koko ona atu simplika ita nia maneira moris nian hodi hafoun ita nia sentido hodi admira ba kriasaun nia furak sira.
- Iha kontexto funu ne'ebé harahun Ukraina no fatin seluk iha mundo, ema balun sente susar atu harohan/reza hanesan fali Nai Maromak laiha ka nonok de'it iha tempu susar sira nee. Maibé, ho nunee ita reza ba dame bele hafanun ita nia sentidu de responsabilidade no solidariedade ba/ho sira ne'ebé terus teb-tebes iha funu ne'e. Ida ne'e la'os kona ba atu husu dame nune'e agressor sira bele hetan vitoria, maibé dame lolos no ne'ebé ezijente liu, atu bele hela ba nafatin, tenke inklui justisa no lialos. Loos duni, ohin loron reza ba dame ne'e urgente tebes.

Ba ita sira ne'ebé fiar nain, fiar iha Na'i Maromak mak halo ita laran-metin ne'ebé forte liu duke ta'uk ho futuru. La'os esperansa/laran-metin ne'ebé fraku maibé ho konviksaun, klean iha ita nia fuan, katak Nai Maromak mak servisu nafatin iha nia kriasaun hotu nune'e bolu mós ita atu servisu, hodi foti ita nia responsabilidade, ba ita nia an rasik no ba dersaan tuir mai.

Wainhira dame nee hanesan susar atu to'o ba/assesso no violensia sobu no hafahe família nasaun sira, wainhira perigu oi-oin halo ita susar atu hakmatek, mai ita fo hanoin ita nia an katak: iha moris interior ne'ebé karik kiak liu, ho solidariedade ba ita nia maluk no amizade

ne'ebé buras loron ba loron, husi ne'ebá Kristo moris hias mai hasoru ita. Kristo muda ita nia hateke, lori ita ba mundo ida ne'ebé luan liu no konvida ita atu hakat ba oin ho laran-metin. Ita sei simu Nia?

“Hamutuk”

Evento ida prepara hela atu tulun Kristaun sira cresce/buras “hamutuk”, ne'e “sorumutu Maromak nia emar sira nian”. Informasaun balun tan besik atu publika, durante semana orasaun ba unidade Kristaun nian; ita bele hahu marka iha ita nia kalendario dia 30 Setembro 2023.

Informasaun kona ba sorumutu iha Taizé, semana espesial durante ferias no sorumutu Europeus tuir mai imi bele hetan iha website:

www.taize.fr